

Groupe parlementaire

Här Fernand Etgen

Präsident vun der Deputéiertechamber

19, um Krautmaart

L-1728 Lëtzebuerg

Lëtzebuerg den 21. Dezember 2022

Här President,

Esou wéi d'Chambersreglement et virgesäit, biede mir lech, dës parlamentaresch Fro un d'Madamm Finanzminister an den Här Schoulminister weiderzeleeden.

An der Äntwert op déi parlamentaresch Fro Nummer 7183 vum honorablen Deputéierte Madamm Nancy Kemp-Arendt schreift d'Madamm Finanzminister zum Risiko vun der Iwwerschëldung am Zesummespill mat engem Mangel u finanzieller Bildung speziell bei jonken Erwuessenen ënner anerem dat hei: *"Allgemeng ass et wichteg de jonke Leit fréizäiteg Grondkenntnisser zu verschiddene Finanzthemen ze vermëttelen, an en verantwortungsbewossten Ëmgang mat Geld ze fërderen. Aus deem Grond, gouf am Joer 2017 vum Finanzministère déi national Strategie iwwert Wëssensvermëttlung am Finanzberäich ugeholl. D'Commission de Surveillance du Secteur Financier (CSSF) huet an deem Kontext d'Missioun kritt fir d'Finanzbildung zu Lëtzebuerg ze promovéieren an d'Aktivitéiten an dem Beräich vun der "éducation financière" ze koordinéieren".* Weider schreift d'Madamm Finanzminister: *"Dës Weidere solle Sensibiliséierungscampagnë wéi z.B. "d'Woch vun de Suen" de Kanner a Jugendlechen e besseren a méi responsablen Ëmgang mat Geld vermëttelen."*

Ee wichtige Pilier fir jonk Leit fir de Wäert vun de Suen an hir eege finanziell Grenzen ze sensibiliséieren, läit am Training vum visuelle Gedächtnes, dat awer just asetzt, wann een déi Suen déi een ausgëtt och tatsächlech gesäit, also mat Boergeld bezilt. Déi lescht zwee Joer kouw et duerch d'COVID-Situatioun awer éischter zu enger Promotioun fir méiglechst vill mat Kaarten ze bezuelen. Och déi niddreg Zënse hunn net zur Spuersamkeet erzunn.

An deem Zesammenhang géife mir der Regierung gär dës Froe stellen:


- 1) Ginn déi eenzel Initiative vun der CSSF och mat Responsablen aus dem pedagogesche Beräich koordinéiert an an de Schoule virgestallt, respektiv promovéiert? Falls jo, a wéi engem Zesammenhang? Falls nee, firwat net?
- 2) Gesäit d'Regierung no deenen zwee Joer Kris an och am Kader vun der aktuell héijer Inflatoun besonnesch Moosname vir, fir déi jonk Leit nees méi zum Asaz vu Boergeld ze motivéieren, fir preventiv géint eng Iwwerschuldung vu jonken Erwuessenen ze virzegoen, zum Beispill doduerch, datt d'monnaie légale nees an de Schoukantinnen ugeholl gëtt? Falls net, firwat net?

Mat déiwem Respekt,

Fernand Kartheiser
Deputierten



Roy Reding
Deputierten





LE GOUVERNEMENT
DU GRAND-DUCHÉ DE LUXEMBOURG
Ministère de l'Éducation nationale,
de l'Enfance et de la Jeunesse

Gemeinsam Äntwert vum Minister fir Educatioun, Kanner a Jugend, Claude Meisch, a vun der Finanzministesch, Yuriko Backes, op d'parlamentaresch Fro Nr. 7418 vun den honorabelen Deputéierte Roy Reding a Fernand Kartheiser

Souwuel als Finanzministesch wéi als Educatiounsminister ass et eis wichteg, datt all Jonke Grondkenntnisser vum Fonctionnement vun der Finanzwelt vermëttelt kritt an zu engem mündege Bierger eruwiisst. De Jonke soll seng Finanzsituatioun aschätze kënnen, hie soll e virsiichtegen Ëmgang mat deem wat him zur Verfügung steet, geléiert ginn, grad wéi sech raisonnabel Ziler ze fixéieren, sou datt hie vernünfteg fir seng Zukunft plangen kann, a net an d'Iwwerscholdungsfal geréit.

Eng sënnavoll Gestiou vum de Finanzen ass sécher méi einfach unhand vu Boergeld ze erklären. Et sief drop higewisen, datt net nëmmen d'Finanzwelt vun den traditionelle Moyens de paiement zum virtuelle Geld wiesselt, mee datt d'Boergeld och an der aldeeglecher Praxis ëmmer manner gebraucht gëtt. Dofir gëllt et an éischer Linn, déi Jonk mat den neien Outils financiers ze familiariséieren, sou datt si éischters d'Komplexitéit vun de Finanzservicer erkennen an zweetens e verantwortungsbewossten Ëmgang mat Bank- a Kreditkaarte léieren.

Am Joer 2012 huet d'Commission de Surveillance du Secteur financier (CSSF) e Comité pour la protection du consommateur financier (CPCF) initiéiert, fir mat Verrieder vu verschiddene Ministère, dorënner och dem Finanzministère (MFin), an dem Ministère fir Educatioun, Kanner a Jugend (MENJE), zesammenzeschaffen. Et goufe flott Projeten an d'Weeër geleet (z. B. mobil Applikatiounen zur Gestiou vum perséinleche Budget/Täschegeld). Mir weisen hei op den Informatiounsportal www.letzfin.lu hin. Et gouf och eng "Woch vun de Suen" agefouert, déi hei zu Lëtzebuerg vun der "Fondation ABBL pour l'éducation financière" coordinéiert a vum MENJE ënnerstëtzt gëtt.

D'Scholdeberodungsstell huet didaktescht Material fir d'Schoulpersonal, d'Educateuren aus de Maison relaisen an Elteren ausgeschafft. D'Commission scolaire nationale huet hefir e favorabelen Avis an eng Recommandatioun erausginn.

An den öffentleche Lëtzebuerger Grondschoule gëtt am Kader vum Projet "Notre communauté" vun der asbl "Jonk Entrepreneuren Luxembourg" ënnert anerem den Ëmgang mat de Finanzen thematiséiert. Dëse Projet ergänzt d'Unterrechtsaktivitéite vun den Enseignanten, déi notamment am Kontext vum Mathematikunterrecht esouwuel ee Gefill fir de Wäert vun de Sue schafe wéi och geziilt an enger preventiver Approche unhand vu konkrete Rechebeispiller d'Problematik vun der Scholdefal mat de Schülerinnen a Schüler uginn.

Am Secondaire ass "Jonk Entrepreneuren Luxembourg" mat hire Programme "Fit for life" a "Mini-entreprises" ganz aktiv a gëtt vum MENJE ënnerstëtzt.

Och ausserschoulesch gi Jonker begleet, wa si an enger Détresse psycho-sociale sinn a vun engem vun de conventionéierte Servicer vum Office national de l'enfance (ONE) encadréiert ginn. Sou ginn am Kontext vum betreite Wunne mat de Jonken d'Budgete vun hirem Akommes an hiren Ausgaben systematesch opgestallt.

D'CSSF ass de Moment amgaangen, zesumme mat dem MENJE, dem MFin, dem Ministère fir Konsumenteschutz, der ABL, der ACA a verschiddeenen aneren Acteuren, d'Initiativen, déi bis elo existéieren, ze evaluéieren. Bis Enn Mäerz 2023 wäert den Aarbechtsgrupp, deen zanter e puer Wochen zesummeschafft, nei Strategië festleeën, fir d'Finanzerzéiung weiderzeentwéckelen. Mir leeën dobäi e grouse Wäert drop, datt all Jonker effikass virbereet ginn a wäerten engersäits performant Projeten an der Schoul a ronderëm d'Schoul ënnerstëtzen an anerersäits déi verschiddeenen Aspekter vun der Finanzerzéiung transversal an d'Schoulprogrammen abauen.

Aktuell ginn et keng Donnéeën, déi beleeën, datt den Asaz vu Boergeld, amplaz d'Notze vu Kaarte preventiv op d'Iwwerschëldung géif wierken. Et sief drun erënnert, datt d'Bezuele mat der Kaart, grad an de Kantinnen, en hygieenesche Virdeel huet. D'myCard – déi net nëmmen eng lessenskaart ass – ass iwweregens e gutt Beispill fir ze illustréieren, datt een och e verantwortungsbewossten Ëmgang mat virtuellem Geld ka léieren: D'Kaart muss ëmmer erëm nei opgefëllt ginn, sou datt d'Schülerin an de Schüler nëmmen déi Sue kënnen ausginn, déi och drop stinn.

Lëtzebuerg, den 30. Januar 2023

De Minister fir Educatioun,
Kanner a Jugend

(s.) Claude MEISCH